

那文毅公奏議

那文毅公籌畫回疆善後事宜奏議卷七十五目錄

卷七十五

重定戍兵額數

附訓練

慎重操防

調劑兵丁

查勘路徑

量移軍臺路

那文毅公籌畫回疆善後事宜奏議卷七十五

男容安恭輯

重定戍兵額數

附訓練

慎重操防

道光八年三月二十五日會同阿克蘇辦事大臣
長公清

奏爲酌擬阿克蘇歸併防兵會議具奏事竊

臣

那彥

成准揚威將軍長齡移交善後條議內開阿克蘇
添兵一千名又於所屬之柯爾坪設兵五百名等
語茲與臣長清悉心商酌阿克蘇爲南路適中之
地四通八達形勢扼要與各城有輔車相依之勢

回戶蕃襍設兵千名除各項坐卡差役外所餘不
過五六百名必資重鎮始壯聲威查柯爾坪距城
三百餘里該處回莊二千餘戶人煙稠密卽道光
六年冬間提臣楊芳等督兵剿洗之處長齡因該
處去卡倫甚近是以設兵彈壓臣等伏思兵分勢
單合則勢壯况數萬回衆之中置兵五百名無事
則徒滋擾累回戶有事仍寡不敵衆而軍火糧餉
徒資寇賊不若歸併一處較爲有用又查阿克蘇
所屬拜城地方原設分防叅將一員管領官兵七
十餘員名向稱爲換防美缺查綠營所管除兵馬

錢糧之外並無別項所稱美缺不過因該處回莊
富庶苛斂相沿遂得饒裕回疆多設一官回戶多
添一累此時首重安撫弊之所在不可不除應請
將拜城一營裁撤所有官兵全行歸併阿城該處
仍設臺兵二十名把總一員足供文報往來之役
統計新歸舊設防兵二千二百餘名內除設卡及
各項差兵外計可得操兵一千二百名加以認
眞操練可成勁旅足以控制南北兩路謹

奏

道光八年四月二十二日軍機大臣字寄奉

上諭那彥成奏酌議阿克蘇歸併防兵一摺據稱長齡
移交善後條議內擬將阿克蘇添兵一千名並於所
屬之柯爾坪設兵五百名阿克蘇爲南路適中之地
形勢最要設兵千名除各項坐卡差役外所餘不過
五六百名未足以壯聲威柯爾坪距城三百餘里該
處回戶衆多設兵五百名恐兵單勢弱非惟不足彈
壓且無事時徒滋擾累著照那彥成等所請將柯爾
坪議設防兵五百名統歸於阿克蘇以收實效又阿
克蘇所屬拜城地方原設分防叅將一員管領官兵
七十餘員名該處回莊富庶向多苛斂相沿之弊不

可不除著卽將拜城一營裁撤所有官兵亦全行歸併阿克蘇仍於該處設臺兵二十名把總一員以供文報往來之役統計新歸舊設防兵二千二百餘名除設卡及各項差兵外可得操兵一千二三百名控制南北兩路足成勁旅

道光八年五月初六日會同叅贊大臣固原提督楊公芳喀什噶爾叅贊大臣武公隆阿

奏爲回疆增設防兵通盤籌擬事竊臣那彥成去冬在京請

訓面陳回疆設兵大局擬改防爲眷方能經久當蒙

聖諭命臣熟籌妥辦途次悉心籌畫前經揚威將軍長齡奏留換防兵八千名業蒙

允准在案查新添換防兵數至八千之多合計陝甘兩省舊派防兵總計萬數千人無論盤費浩繁以五年班次分三次更換每年又約有三千名在途內地營伍空虛尤非辦法是以擬改設眷兵庶幾一勞久逸前曾於議覆捐例仍歸甘省摺內具奏在案嗣馳抵阿克蘇與長齡悉心面商據稱從前伊犁烏魯木齊戡定之時

天戈所指剿滅無遺係屬空地不容不遷移關內兵民

以實其地繼經開闢回疆因其人收其地與北路情形不同是以量遣兵丁換防此次再定回疆現計西四城回戶仍有數十萬戶之多此中安設眷兵兵多費多兵少仍不能得力況兵回襍處將來生齒日繁必增流弊不如仍設防兵辦理較易等語臣反覆籌思長齡所議思深理足深得因地因時之宜臣蒙

聖明簡畀一切應辦事件惟慮才識短淺不能措置萬全曷敢固執已見回護前奏致悞國事應請如長齡所議仍設換防茲與臣楊芳臣武隆阿臣蘇清

阿等公同面議並將臣途次奉到上年十二月初二日軍機大臣字寄奉

上諭據武隆阿奏善後情形必須變通以期經久一摺所奏不爲無見著那彥成抵喀什噶爾時察看情形會同熟籌妥議具奏武隆阿摺著鈔寄閱看欽此臣

武隆阿密陳換防移眷善後大局情形一摺公同閱看伏思回疆大局人心甫定非安設重兵勢難鎮撫今旣設兵換防尤不能不計及久遠查長齡等今年正月間原議暫添防兵八千名合之舊設防兵二千六百名共計一萬零六百名分布各城

惟今昔情形不同經費既須節省而各處營伍更不可空虛自應量爲減裁所有原議增添伊犁滿兵一千名伊犁亦關緊要未便顧此失彼且馬隊較漢兵經費倍增此項增添滿兵應毋庸議綠營兵七千名內亦酌減五百名共減兵一千五百名以節糜費查現在首逆就擒內外夷情震於

天威自不敢復萌異念所有前議喀什噶爾添設換防總兵一員防兵旣多非大員不能統領應請照原議添設總兵一員管帶綠營防兵照伊犁綏定鎮總兵例班滿三年由叅贊大臣奏請

簡派以均勞逸惟查陝甘兩省及口外共三提十鎮額缺亦難於再增茲有甘肅涼州鎮總兵一缺從前以該處界近熟番設兵七千六百餘名總兵一員茲查該處東界蘭州西界甘州相去俱不過五站界在督提兩標重兵之間聲勢聯絡足資控制且昇平日久熟番安居樂業無異平民應請將涼州鎮總兵一缺改爲喀什噶爾換防總兵其一切應得廉俸悉照舊例無增無減以下副將等官均須增設容_臣等查明妥擬另

奏至涼州一缺既移駐喀什噶爾該處營汛亦須設

官統領查有甘肅莊浪協副將一缺堪以移駐其
莊浪協一缺查有涼州鎮中營遊擊一缺堪以移
駐如此轉移辦理費不加增兵收實用且該處既
改鎮爲協其額兵七千六百餘名爲數太多於體
制未協應裁汰一千五百名以八百歸於甘肅督
標以七百歸於河州鎮標之循保起三營此皆精
兵之所增一兵卽得一兵之力於內地亦大有裨
益如蒙

俞允所有改鎮爲協一切事宜應請

飭下部臣及陝甘督臣照例辦理至向例口外換防官

兵均儘陝甘兩省口內外十四標營派撥茲查陝甘得力官兵惟甘肅督標陝西撫標固原提標陝安鎮標漢中鎮標河州鎮標西寧鎮標西安鎮標此數營向來營制整肅練習嫻熟此次平定逆回最爲得力以上該八處爲內地勁兵不值多派換防按每百名抽派五名共派二千三百七十五名至甘州提標寧夏鎮標肅州鎮標延綏鎮標並議改之涼州協營該五處較各營稍次按每百名抽派十名共派三千五百六十五名烏魯木齊提標巴里坤鎮標該二處屯工需人亦未便多派亦按

每百名抽派五名共派五百六十名共計派撥兵
六千五百名查從前內地派兵換防故習大半皆
以衰老充數到戍後又復准其告駐一兩班至三
班不等其事始於姑息以致各城防兵半屬衰殘
徒然虛糜糧餉自此次奏准之後應請

旨嚴飭認真挑派年逾四十之人卽不准換防告駐之
習亦應請永遠禁止其擬派各標營兵額細數另
繕清單恭呈

御覽惟現派換防兵丁雖按各該標營優劣抽派然兵
無強弱要在教練得宜卽成勁旅

臣武隆阿渥受

厚恩亦必竭盡心力專事操防以歸實用臣等公同酌
商查喀什噶爾外通各部落逼近各布魯特叅贊
大臣駐劄爲回疆要領應設兵三千七百名連原
設滿漢防兵一千二百五十餘名共四千九百餘
名英吉沙爾亦界臨邊徼舊有布魯特游牧應增
兵二百名連原設滿漢兵二百八十名共四百八
十名葉爾羌毗連外夷煙戶繁多爲適中之地與
喀什噶爾阿克蘇爲犄角之勢應添防兵六百名
連前原設滿漢防兵八百八十餘名共一千四百
餘名和闐僻在一隅應照舊安設防兵二百三十

餘名阿克蘇爲回疆南北衝要應設防兵一千名
連舊設防兵七百五十餘名共一千七百五十餘
名烏什形勢險要在在皆布魯特游牧爲阿克蘇
西路門戶應添設防兵一千名連舊設防兵九百
餘名共一千九百餘名以上增設綠營防兵六千
五百名連舊設二千六百餘名共計九千一百餘
名足資鎮撫惟喀什噶爾現駐滿兵六百餘名內
伊犁之索倫錫伯二百名烏魯木齊滿兵四百餘
名索倫錫伯弓馬嫻熟漢仗強壯烏魯木齊馬隊
弓馬平常技藝生疎難期得力應請裁歸原營二

百名足備緩急復查索倫錫伯二營每年派撥南北兩路換防存城之兵亦形單弱應請於百分裁二項下酌添索倫錫伯二營兵四百名索倫人戶無多止能添兵一百名錫伯人戶繁多可添兵三百名此二項兵丁每月關領銀二兩並無口糧計連官員廉俸增費不過一萬餘兩且係節省之餘每年輪流南北兩路換防不至乏人於防守兩有裨益惟此時回疆甫定爲鎮撫起見不可不多兵防守然此項兵丁皆係內地營伍之兵邊圉不可不守根本尤當兼顧嗣後酌量情形三年後當酌

減二千名五年後再酌減二千名共減四千名尙存五千餘名至時某城應減若干或有暫且不能減省之處皆由叅贊大臣斟酌奏辦再現在添防均係出征官兵已經三載自應早爲更換伏乞

勅下陝甘督

臣

自本年秋季起按照奏定數目分三季

派遣來防更替以示體卹嗣後仍循五年舊例分三班更換定爲章程以上各情形

臣

等公同悉心通盤籌計意見相同謹

奏

道光八年六月初七日

上諭那彥成等奏回疆增設防兵通盤籌擬一摺著軍機大臣會同長齡議奏

道光八年六月二十一日奉

上諭軍機大臣會同長齡議覆那彥成等奏增設防兵通盤籌議一摺前因回疆甫經平定暫添防兵八千名合之舊設防兵共計一萬餘名分布各城以資守禦現在首逆就誅邊陲安謐那彥成等體察情形於伊犁滿兵及綠營兵內共減兵一千五百名以節糜費著照所請辦理其喀什噶爾新設總兵著將甘肅涼州鎮總兵一缺改爲該處換防總兵班滿三年由

參贊大臣奏請簡派應行增設副將等官著那彥成等妥議具奏現任涼州鎮總兵哈豐阿著留於甘省交該督差委俟有缺出請旨簡放其涼州鎮營汛卽以甘肅莊浪協副將移駐該處以資統領並將涼州中營遊擊移駐莊浪至涼州鎮旣改鎮爲協應裁汰額兵一千五百名分撥甘肅督標及河州鎮標各營一切事宜著該部行咨陝甘總督照例辦理至口外換防官兵向係儘陝甘兩省口外內十四標營派撥從前內地派兵換防故習大半以衰老充數到戍後復准告駐一兩班至三班不等以致虛糜糧餉嗣後

該管督撫提鎮等務須認真挑派兵丁內年逾四十者卽不准換防其班滿告駐陋習著永遠禁止並著叅贊大臣務將派往之換防兵丁加意操演俾得悉成勁旅以歸實用此項換防兵丁三年後應酌減二千名五年後再減二千名屆時何城應減若干或有暫難裁減之處由叅贊大臣酌量奏辦現在留防均係前次出征官兵已經三載著陝甘總督自本年秋季起按照現定數目分三季派遣前往更替此後仍循五年舊例分三班更換以期經久能行俱照所議行

道光八年六月初二日會同叅贊大臣固原提督
楊公芳喀什噶爾叅贊大臣武公隆阿

奏爲增設各城將備除留額設防兵外將征兵全行

凱撤事竊

臣

等會奏西四城及阿克蘇烏什增設

防兵喀什噶爾移駐總兵一員作爲實缺並聲明

副將以下換防將備容

臣

等擬議另辦奏請

聖鑒在案伏思喀什噶爾英吉沙爾葉爾羌和闐阿克

蘇烏什各城原設統帶防兵將備自副將以下等

官共八十三員名前經長齡奏增防兵八千名議

定應設領兵將弁二百十五員名今

臣

等悉心酌

擬已將原設兵丁裁減一千五百名則官員亦應從減並有因地制宜酌量損益之處通共減去原議一百二十四名再無可以從減應添設將備等九十一員名除滿兵照舊安設毋庸議增官員外查喀什噶爾舊設綠營防兵六百二十餘名新增三千七百名業已奏改涼州鎮作爲喀什噶爾換防總兵應將原設副將裁撤除原設遊擊一員都司一員守備一員千總三員把總三員外委六員均照舊換防外應添設遊擊一員都司三員守備六員千總十一員把總二十員外委二十六員英

吉沙爾舊設綠營防兵二百名新增二百名除原設遊擊一員千總一員把總一員外委二員均照舊換防外應添設守備一員把總一員外委一員葉爾羌舊設綠營防兵六百八十餘名新增六百名既歸總兵節制應將原設副將一員遊擊一員裁撤改設叅將一員原設都司二員裁撤一員除原設千總三員把總六員外委九員均照舊換防外應添設守備二員千總一員把總二員外委三員和闐原設綠營防兵二百三十餘名並未加增原設都司一員千總一員把總一員外委二員均

照舊換防毋庸添設阿克蘇舊設綠營防兵七百餘名新增一千名應將原設遊擊三員裁撤二員改設叅將一員除原設千總二員把總五員外委六員均照舊換防外應添設都司一員守備二員千總一員把總一員外委三員烏什舊設綠營防兵七百八十餘名新增一千名應將原設叅將一員裁撤改設副將一員原設守備二員裁撤一員除原設都司一員千總三員把總四員外委八員均照舊換防外應添設都司一員把總二員外委四員以上裁增改設計減派副將一員遊擊二員

實增設叅將一員都司四員守備十員千總十三員把總二十七員外委三十八員邊防之制要在因時張逆未獲以前一萬八千名兵尙嫌其少今張逆旣獲邊圉又安則八千尙覺其多是以臣等前奏請裁至六千五百名仍聲明三年五年之後陸續裁撤惟官員亦然內地營制關係更重不可不爲兼顧再因籌商嗣後派調換防應請於陝甘兩省實缺候補兩項人員內每屆班期酌量揀派實缺人員一半其餘於候補人員內或品級較小之員擇其才具技藝堪以造就之人給與委牌令

其統帶該屬兵丁出口到防後再有不敷由叅贊大臣及各城大臣按缺委署報明叅贊照例咨部庶內地各營實缺將備不至虛懸於營制甚有裨益如蒙

俞允應請

勅下陝甘督臣遵照辦理其分設營制容臣等另文咨

部備查至長齡節次奏撤綠營征兵現留喀英葉和阿烏六城綠營征兵九千八百餘名除照臣等前議增設綠營防兵六千五百名又四城原設綠營防兵一千七百餘名外尙應撤兵一千六百餘

名現已檄撤寧夏鎮標兵五百名烏魯木齊提標兵五百八十一名固原提標兵五百十八名派令副將張國相等帶領凱撤歸伍謹

奏

道光八年七月初三日奉

上諭那彥成等奏酌議增設各城將備一摺回疆喀什噶爾等西四城及阿克蘇烏什原設統帶防兵將備自副將以下等官共八十三員名前經長齡奏因增設防兵八千名議將領兵將備共設二百十五員名現已將原設兵丁裁減一千五百名則官員亦應從

減據那彥成等查議具奏著照所請除滿兵照舊安設毋庸議增官員外喀什噶爾舊設綠營防兵六百二十餘名新增三千七百名前奏准將涼州鎮作爲該城換防總兵所有原設副將著卽裁撤其原設遊擊一員都司一員守備一員千總三員把總三員外委六員均照舊換防外著添設遊擊一員都司三員守備六員千總十一員把總二十員外委二十六員英吉沙爾舊設綠營防兵二百名新增二百名除原設遊擊一員千總一員把總一員外委二員均照舊換防外著添設守備一員把總一員外委一員葉爾

羌舊設綠營防兵六百八十餘名新增六百名卽歸
總兵節制著將原設副將一員遊擊一員裁撤改設
叅將一員原設都司二員裁撤一員除原設千總三
員把總六員外委九員均照舊換防外著添設守備
二員千總一員把總二員外委三員和闐原設綠營
防兵二百三十餘名並未加增原設都司一員千總
一員把總一員外委二員均照舊換防無庸添設阿
克蘇舊設綠營防兵七百餘名新增一千名著將原
設遊擊三員裁撤二員改設叅將一員除原設千總
二員把總五員外委六員均照舊換防外著添設都

司一員守備二員千總一員把總一員外委三員烏
什舊設綠營防兵七百八十餘名新增一千名著將
原設叅將一員裁撤改設副將一員原設守備二員
裁撤一員除原設都司一員千總三員把總四員外
委八員均照舊換防外著添設都司一員把總二員
外委四員以上裁增改設共減派副將一員遊擊二
員實增設叅將一員都司四員守備十員千總十三
員把總二十七員外委三十八員此項換防人員每
屆班期著陝甘總督於陝甘兩省酌派實缺人員一
半其餘於候補各員內或品級較小之員擇其才技

堪以造就者給與委牌令其統帶該處兵丁出口到防後再有不敷由叅贊大臣及各城大臣按缺委署報明叅贊照例咨部其各城現應凱撤各兵俱著照所議辦理該部知道

道光八年八月初三日會同叅贊大臣固原提督楊公芳喀什噶爾叅贊大臣武公隆阿

奏爲酌撤喀葉英三城換防滿兵歸伍操演事竊查葉爾羌辦事大臣札隆阿咨稱該處原設巴里坤等處換防佐領二員驍騎校二員滿兵一百九十七名此項兵丁向隨卡倫侍衛守卡巡防現已裁

撤侍衛改派綠營官兵駐卡是滿兵並無應當差
使徒糜糧餉不如撤回本旗歸伍操練並可節省
經費銀四千三百餘兩口糧八百餘石等語臣等
查葉爾羌現在新增綠營防兵六百名合計新舊
防兵一千二百八十名分布巡防足資控制札隆
阿不爲無見應照所議撤令歸伍復查得喀什噶
爾原設滿兵六百二十名內烏魯木齊駐防滿兵
三百二十名前經臣等以該駐防兵丁技藝生疎
奏請撤回二百名改換索倫錫伯馬兵二百名業

蒙

允准在案計喀什噶爾尙有裁剩烏魯木齊滿兵二百二十名又英吉沙爾原設烏魯木齊滿兵八十名該滿兵旣不得力喀城現有伊犁及索倫錫伯馬隊五百足資操防英城新添綠營防兵二百名巡守卡倫滿兵亦無差使應請將喀英二城現存烏魯木齊滿兵二百名及領兵協領等官一併撤回本營統計喀英葉三城歲可節省鹽菜馬乾等銀八千七百餘兩口糧二千八百餘石至各城需用貼寫尙在烏魯木齊巴里坤古城馬甲內挑補年滿遞陞除現撤滿兵已挑貼寫准其咨留外續有

缺出應令各城咨明伊犁將軍烏魯木齊都統在
於駐防馬甲內擇其通曉清文樸實純正者咨送
各城充當貼寫以資辦公謹

奏

道光八年九月初三日奉

上諭那彥成等奏酌撤換防滿洲兵歸伍操練一摺葉
爾羌新增綠營防兵合計新舊防兵一千二百八十
名分布巡防足資控制喀什噶爾現有伊犁及索倫
錫伯馬隊五百名無悞操防英吉沙爾新添綠營防
兵二百名巡守卡倫滿洲兵亦無差使著照所請卽

將葉爾羌原設巴里坤等處換防佐領二員驍騎校二員滿洲兵一百九十七名並喀什噶爾英吉沙爾二城現存烏魯木齊滿洲兵二百名及領兵協領等官一併撤回本營以節糜費餘俱照所議辦理該部知道

道光八年八月二十二日會同叅贊大臣固原提督楊公芳喀什噶爾叅贊大臣武公隆阿

奏爲操習兵伍以重邊防事竊查從前換防惡習內地各營往往以老弱充數旣到防所分給各項佔役外餘兵無幾雖城守一事已難支持操防之說

純屬子虛以致外夷輕視敢肆猖獗臣等前將派防實在情形據實具奏業奉

諭旨飭下陝甘兩省嗣後派防官兵俱儘年力精壯不得以老弱充數欽此伏思兵無強弱惟在操習有法兵不訓練與無兵等茲回疆新增舊設換防兵共一萬零六百名歲需

帑金二十四萬餘兩倘仍因循怠惰不加訓練徒有增兵之名而無增兵之效邊防緊要坐任廢弛實爲可惜况現設總兵大員操防之事乃其專責非議定章程奏明立案竊恐始勤終怠不能永遠遵

行_臣等公同酌議喀什噶爾地臨極邊較各城爲喫重現設防兵四千三百名內除防守舊城七里河堡及坐守卡倫各項役使兵二千五百名外挑選年力精壯技藝可觀之兵可得二千名責成喀什噶爾總兵舒倫保督率將備按二百名爲一班分爲十班每月屆三六九等日操演擡礮擡鎗二五八等日操演鳥鎗一四七等日操演弓箭長矛逢十日合操速戰陣一次_臣楊芳_臣武隆阿此次親冒矢石在前敵打仗見擡礮擡鎗大爲得力而卡內外回夷所畏者以擡礮擡鎗爲第一其次鳥

鎗其次長矛綠擡礮擡鎗便捷而能致遠操演嫻熟實堪百發百中威不可當鳥鎗則綠營中尙不能用之精巧長矛爲步兵利器弓箭實不能如法就其所長加之精練可成長勝之軍現擬每月令總兵官校閱三次每日派該將備等輪流操演每一月叅贊大臣校閱一次倘有步伍不整技藝不熟者將該鎮將等記過一次記至三次應將溺職之員據實叅辦以肅軍令至兵丁等按日練習無所鼓勵不足以作其勇敢之氣茲於叛產房租項下酌籌操防費用足敷辦理謹擬遇總兵閱視每

臺礮擡鎗中三靶者賞錢三十五文中二中一者
遞減十文鳥鎗中三靶者三十五文中二靶者減
十文弓箭中五箭者三十五文四箭三箭者遞減
十文長矛以捷速如法者爲上亦賞錢十文其有
技藝生疎者隨時責處每屆叅贊操閱之期一切
賞需俱加一倍至伊犁滿兵五百名亦令勤習騎
射遇秋末冬初草肥馬壯之時叅贊大臣遵照舊
例帶往山內演習行圍其應如何酌賞之處聽叅
贊大臣臨時斟酌以上馬步兵丁勤加教練使邊
夷震懾聲威於鎮撫大有裨益其餘各城防兵已

行文各城大臣酌量挑拔隨時訓練俾口外營伍
曰有起色且藉操防以資津貼於兵丁不無小補
謹

奏

道光八年九月二十二日奉

上諭那彥成等奏籌議操兵章程一摺回疆增設防兵
籌給餉糈原期折衝禦侮悉成勁旅俾外夷震懾永
靖邊陲茲據該督等籌議按期操練章程與朕本年
通飭各省營伍勤於訓練諭旨相符其令滿兵於草
肥馬壯時演習行圍尤當如是辦理著照所請將喀

什噶爾現設防兵四千三百名內除分派防守及各
項差役外挑選年力精壯技藝可觀之兵二千名責
成總兵舒倫保督率將備分爲十班按所定日期操
演各項技藝每日派將備輪流看操每屆十日由該
總兵較閱一次每屆一月該叅贊大臣較閱一次倘
有步伍不整技藝不熟者將鎮將等記過一次記至
三次卽行據實叅辦以示軍令該總兵較閱時分別
鎗礮弓箭中靶多寡長矛步伍捷速者照所定數目
分賞其有生疎怠玩者隨時責處每屆該叅贊閱視
之期一切賞需俱准加倍其伊犁滿兵五百名亦令

勤習騎射該叅贊於秋末冬初之時遵照舊例帶同
演習行圍酌加賞資其餘各城防兵亦著各該大臣
等酌量挑拔隨時簡練武隆阿等嗣後當照此章程
認真督率加意策勵務期日久勿懈以簡軍實而壯
聲威

道光八年十二月初十日會同喀什噶爾叅贊大
臣武公隆阿

奏准阿克蘇辦事大臣長清烏什辦事大臣布彥泰
會同咨呈阿克蘇舊設綠營換防官兵七百八十
四員名新增防兵一千名烏什舊設換防官兵七

百九十員名新增防兵一千名兩城兵力足資控制所屬卡倫現已一律改歸綠營經營駐防滿兵並無差使查阿克蘇原設古城巴里坤佐領防禦驍騎校各一員滿兵一百四十名除阿克蘇應留委筆帖式六名貼寫滿兵八名外其餘官兵堪以裁撤各歸原營操練統計阿烏二城歲可節省鹽菜等銀三千九百餘兩口糧九百餘石請查核具奏前來

臣等查各城卡倫侍衛業奏撤改歸綠營駐卡巡防滿兵並無應當差使前經

臣等將葉爾羌駐

防滿兵及喀什噶爾英吉沙爾原設烏魯木齊駐防兵丁奏明裁撤以節冗費仰蒙

諭旨允准在案茲長清布彥泰請裁各該城駐防滿兵亦爲節省虛糜起見與臣等前奏事同一例相應奏明請

旨將阿克蘇烏什兩城原設滿營駐防官兵概行裁撤各歸原營操防所挑委筆帖式貼寫滿兵准其照舊額咨留年滿仍在古城巴里坤各旗營各取當差以符舊制謹

奏

道光九年正月十二日奉

上諭那彥成等奏查明阿克蘇烏什所屬卡倫侍衛現已改歸綠營其駐卡巡防滿洲兵並無差使請一律裁撤等語著照所請所有阿克蘇烏什兩城原設滿洲營駐防官兵著概行裁撤名歸原營操防所挑委筆帖式貼寫滿洲兵准其照舊額名留年滿仍在古城巴里坤各旗營咨取常差以符舊制該部知道

道光八年十二月初十日會同喀什噶爾叅贊大臣武公隆阿

奏爲酌定調劑防兵限制以歸畫一事竊查回疆南

路八城換防綠營兵丁舊制馬兵月支鹽菜銀一兩二分五釐步守兵月支鹽菜銀一兩近年食物昂貴勢難敷用上年松筠奏請照西藏防兵豐折鹽菜銀六七兩之數減半支給經長齡以經費有常議駁奏請酌量加增未定銀數臣那彥成抵喀後通盤籌畫防兵月支分例委係不敷食用且當兵燹之後百物增昂又復裁革陋規兵丁不能稍有非分沾潤此後各城防兵難免拮据然一經議增兵餉卽關經費是以仿照伊犁之例奏請於喀什噶爾建設官舖籌畫開款作爲資本不動正項

每年所獲利息以六分攤給喀英二城換防滿漢官兵三分津貼各衙門辦公一分修理衙署兵房葉爾羌一律照辦行之數年東四城防兵亦可籌計撥給等因奏蒙

諭旨允准在案茲喀葉二城官舖業已辦有頭緒換防

兵丁現亦陸續前來

臣

等復又悉心體察官舖餘

利必須年終方能結數且利息年多年少難以懸定倘辦理少有不善或承辦官兵從中剋減轉無調劑實惠況東西城同一防兵亦應一例籌畫撥給方足以昭公溥反覆籌思不若明定限制普律

津貼按月與原設鹽菜銀一兩支放俾兵有所適
從而官亦易爲經理查綠營換防馬兵月支銀一
兩二分五釐步守兵月支銀一兩今擬照綠營征
兵月支本身跟役鹽菜夫折等銀二兩四錢一分
之例減去夫折銀九錢六分不論馬步守每月給
銀一兩四錢五分其應領馬兵分例者每月津貼
銀四錢二分五釐其應領步守兵分例者每月津
貼銀四錢五分暫行動支正項墊給按月散放俟
屆年終叅贊大臣具奏官舖獲利內將喀菜二
城所獲六分餘利共銀若干兩奏明撥入正項歸

還墊款統計南八城綠營防兵一萬六百餘名約需津貼銀五萬五千餘兩如果官舖所獲六分餘利尙有盈餘歸於下年動支不敷之年在於茶稅項下撥補各城墊支銀兩並請造冊奏銷以省往返撥解之勞如此一轉移間則綠營防兵咸叨實惠與加餉無異而度支仍非取給於正帑將來三年後裁兵二千五年後裁兵四千津貼銀款有羨餘而無不敷并可湊作正項少調內地經費似與原奏重

帑恤兵之意籌畫益臻詳盡於兵丁更有裨益至換

防滿兵向照征兵例月支鹽菜銀一兩七錢五分較之綠營防兵舊制本屬優厚卽以綠營現得津貼銀數併而計之亦比滿兵有少無多且現在各城滿兵業已先後奏請裁撤惟喀什噶爾尙存伊犁駐防及索倫錫伯等營滿兵五百名前經臣等奏明增給馬匹喂養仰蒙

聖恩允准在案該滿兵業已受惠毋庸再議調劑謹奏

道光九年正月十二日奉

上諭那彥成等奏調劑防兵一摺回疆南路八城換防

綠營兵丁向例馬兵月支銀一兩二分五釐步守兵月支銀一兩茲據那彥成等查明現因物價較昂食用未免拮据自應量加調劑著照所請馬步守兵每月給銀一兩四錢五分其應領馬兵分例者每月津貼銀四錢二分五釐應領步守兵分例者每月津貼銀四錢五分統計八城綠營防兵一萬六百餘名共需津貼銀五萬五千餘兩先行動支正項按月墊給俟屆年終將喀什噶爾葉爾羌二城官鋪款內所得六分餘利共銀若干兩奏明撥還正項墊款尙有盈餘歸於下年動支不敷之年在於茶稅項下撥補

實造冊報銷以裕兵食而重帑項該部知道

道光八年十二月初十日會同喀什噶爾叅贊大

臣武公隆阿

奏查各城留防征兵前經

臣

等奏明俟換防兵丁到

日分起撤回在案茲甘省派赴喀什噶爾換防之

烏魯木齊提標各營兵丁已抵防所

臣

等卽在阿

原甘州提標肅州涼州鎮標所屬各營征兵內撤

回兵四百十五名派潼關營都司福壽等於十一

月二十日管帶起程入關歸伍沿途車駝分例均

照凱撤支給現屆冬令嚴寒樹窩子一路並無住

宿之處撤回之兵均令其由葉爾羌大路行走謹
奏奉

硃批知道了

道光九年正月十二日會同喀什噶爾叅贊大臣

武公隆阿

奏臣等前奏喀什噶爾英吉沙爾葉爾羌阿克蘇烏
什五城增設防兵六千五百名三年後堪以裁撤
二千名五年後再裁二千名欽奉

上諭軍機大臣會同議覆增設防兵通盤籌議一摺此
項換防兵丁三年後應酌減二千名五年後再減二

千名屆時何城應減若干或有暫難裁減之處由叅贊大臣酌量奏辦欽此欽遵在案茲地方甫經安定固未便卽議裁兵第現在回子安居樂業卡外夷情靜謐大勢已可概見似三年之內裁兵二千名實可先期預定竊恐後任因循游移以兵多爲足恃不肯依限裁撤以致虛糜

帑項罔顧內地營制舍本逐末不可不早爲籌及臣等會同商酌應請於二年後在於喀什噶爾增兵內裁撤一千名阿克蘇烏什兩城增兵內各裁撤五百名由叅贊大臣先期咨明陝甘督臣於換防

時將陝甘緊要營分均勻攤減以實內地營伍再
二年後再減二千名屆期仍由叅贊大臣斟酌情
形具奏似亦毋庸拘定五年期限總之撫綏得宜
卽如從前兵不爲多而晏然七十餘年之久如果
辦理不善卽一萬餘兵散布於八城數十萬回衆
之中亦屬無益要期因時制宜內地與邊疆並重
庶兵歸實用餉不虛糜於事理方爲盡善謹

奏

道光九年二月十四日奉

上諭那彥成等奏請定限裁撤換防兵丁等語喀什噶

爾等五城增設防兵六千五百名前經軍機大臣等
議准三年後酌減二千名五年後再減二千名屆時
由叅贊大臣酌量奏辦茲據那彥成等奏現在回子
安居樂業卡外吏情靜謐著照所請於二年後在喀
什噶爾增兵內裁撤一千名阿克蘇烏什兩城增兵
內各裁撤五百名由叅贊大臣先期咨明陝甘總督
於換防時將陝甘緊要營分均勻攤減以實內地營
伍再二年後再減二千名屆期仍由叅贊大臣酌量
情形具奏毋庸拘定五年期限該部知道

調劑兵丁

道光八年九月十五日會同喀什噶爾叅贊大臣
武公隆阿

奏爲增給換防滿兵馬料添設綠營差馬以利差操
事竊查喀英葉三城原設馬隊前經臣等奏明將
葉英二城換防滿兵全行裁撤以節糜費並將喀
什噶爾額調烏魯木齊駐防兵三百二十名先後
奏撤添調錫伯索倫兵二百名統計喀城現存換
防伊犁滿洲駐防及錫伯索倫兵五百名查向來
伊犁換防滿兵均在原營支領馬乾防所定制夏

秋全行收放冬春僅給五十匹喂養日支料二京
升餘仍牧放錫伯索倫原營並無馬乾防所亦不
酌給草料所有該兩營官兵騎馬向來均係自行
喂養以致佔據回莊地畝或強派回子交納糧料
俱所不免今欲認真操練又嚴禁擾累必須籌給
草料將馬匹全行存城喂養方足以濟兵力而收
實效現在喀城新增糧石充裕核計歲需馬料足
敷供支總係回疆所產固不可糜費亦不宜多貯
擬請將錫伯索倫兩營兵四百名均給予馬匹喂
養伊犁駐防滿兵一百名原營例支馬乾因該兵

丁留爲家屬養贍防所給予五十匹馬料並不咨
回原營核扣向藉回子供應今陋規全行革除兵
丁頗形苦累似應推廣

仁恩於原設馬料五十匹之外請加給五十匹草料喂
養俾伊犁駐防滿兵普律支領官料仍免扣原營
馬乾以示體卹統計馬兵五百名共額馬五百匹
連領兵官員例馬若照舊制每馬日給料二京升
不敷喂養應請酌增每馬日給料三京升秋冬二
季全數在槽喂養夏秋二季四分在槽六分出青
設有緩急堪以調遣無悞俾馬騰士飽實爲邊防

要務至南八城惟喀什噶爾葉爾羌英吉沙爾烏
什等四城地處極邊時有查探卡外差務換防綠
營馬兵無多且向不領馬出關每遇差遣俱騎用
回子烏拉馬匹現經臣等於裁革隨規摺內聲明
非有大差不准擅調烏拉馬匹若兵丁遇有查卡
差使卽行傳調仍不免於擾累應於綠營內每營
添設差馬十匹計喀什噶爾中左右前後城守六
營應添馬六十匹葉爾羌英吉沙爾烏什等三城
共六營應添馬六十匹共添馬一百二十匹在於
抄獲逆回馬匹並名愛曼布魯特呈遞馬匹內撥

給毋庸動項採買其錫伯索倫兩營兵丁如有未經攜帶馬匹者亦於前項馬匹內給領班滿繳還各營差馬准其照例三分倒斃在於經牧孳生廠內撥補所需喂養卽照滿營馬匹之例在於新增糧內照數支給此後三年裁兵二千五年裁兵四千均由叅贊大臣臨時一併酌減現在滿營綠營馬匹均責令帶兵章京將領等實力稽查叅贊辦事協辦各大臣按月點驗一次如有短缺疲瘦從重究辦似此斟酌辦理一年所費料石無多新增地糧儘足敷用而於營務差操均爲得力相應奏

明請

旨遵行滿營及索倫錫伯官兵業已全行官給料石倘
仍前強派回子供應及佔據地畝等事一經查出
從嚴懲辦再喀城柴薪甚貴附近地方無可樵採
之處臣等在於阿克蘇軍需餘剩車輛內咨調大
車七十輛修理完整分撥各營以爲拉運柴薪之
用所需車馬一百四十匹亦於抄產馬內撥給俾
兵丁輪流驅使咸資便利以示體卹喂養倒斃均
照差馬之例辦理車輛亦歸本營自行修理謹

奏

道光八年十月十七日奉

上諭那彥成等奏請增給換防滿洲兵馬料添設綠營
差馬一摺喀什噶爾換防伊犁滿洲兵向在原營支
領馬乾錫伯索倫兩營向無馬乾官兵所騎馬匹均
係自行喂養以致佔據回莊地畝或強派回子交納
糧料均所不免自應籌給草料將馬匹全行存城喂
養以利差操而免擾累據那彥成等查明新增糧石
充裕歲需馬乾足敷供支著照所請錫伯索倫兩營
兵四百名均給予馬匹草料伊犁駐防滿洲兵一百
名著於原給五十匹馬料之外加給五十匹草料俾

得普律支領官料仍免扣原營馬乾以示體卹統計額馬五百匹並領兵官員例馬准其每匹日給料三京升春冬二季全數在槽喂養夏秋四分在槽六分出青以備調遣至南八城內之喀什噶爾等四城換防綠營馬匹無多每遇查探卡外差務俱騎用回子烏拉馬匹不免擾累著於綠營內每營添設差馬十匹喀什噶爾城守中左右前後六營設馬六十匹葉爾羌英吉沙爾烏什等三城共六營設馬六十匹均於抄獲逆回馬匹並各愛曼布魯特呈遞馬匹內撥給其錫伯索倫兩營兵丁如有未經攜帶馬匹者亦

著於前項馬匹內給領班滿繳還所需馬料著照滿洲營馬匹之例在新增糧內照數支給所有滿洲營及綠營馬匹均著責令帶兵章京將領等實力稽查並著叅贊辦事幫辦各大臣按月點驗一次如有短缺疲瘦從重究辦現在滿洲營及索倫錫伯官兵旣已官給馬料倘有仍前強派回子供應及佔據地畝等事一經查出卽行從嚴懲辦至喀什噶爾附近地方無處樵採據那彥成等請於阿克蘇軍需餘剩車輛內撥調大車七十輛分給各營爲運送柴薪之用所需車馬一百四十四匹准其於抄產馬匹內撥給俾

兵丁輪流驅使以資便利餘俱照所議辦理該部知道

查勘路徑

謹案道光八年三月二十五日會同阿克蘇辦事大臣長公清奏內

奏阿克蘇至伊犁捷徑前奉

諭旨令伊犁將軍德英阿等派員履勘茲臣等亦訪有阿克蘇所屬西南巧塔爾達板間有貿易回民私自度越又查得賽里木所屬之阿爾通霍什亦通北路均可逕赴伊犁伏查米嶺一徑陡滑異常盤旋八九十里至峻處步步皆現修米礮三日不修一人一騎不能飛越誠爲南北路之扼塞今改由

他徑於兵回行走原屬兩便第思開拓之初當時
在事諸臣其才幹勝於今人百倍又豈不知別開
捷徑轉專留此滑險之路且累回民終年修理臣
身歷其境始知此路非日常修墊則不可行尋常
無事則修之而行倘一旦有事我但不修卽成廢
境此中操縱實有深意正未可以更易臣愚昧之
見擬將現在查出私通伊犁捷徑無論幾處概行
封禁並酌派本城官兵數十名分撥設卡輪班嚴
查偷度藉以稽茶葉大黃之出入封禁之後倘有
私販經由一經盤獲治以應得之罪已一面行文

伊犁將軍亦應派撥員弁由北路設卡盤查如此
嚴定章程令南北必經冰嶺一路方不失前人措
置之宜至如何安兵守卡容臣等另議章程會銜
具奏謹合詞恭摺奏

聞謹

奏

謹按道光八年三月二十五日廷寄內奉

上諭冰嶺一路向爲南北通衢其阿克蘇所屬西南巧
塔爾達板及賽里木所屬之阿爾通霍什均爲赴伊
犁捷徑著概行封禁以杜弊端並著酌派本城官兵

數十名分撥設卡嚴查偷度以稽茶葉大黃之出入
倘封禁之後有私販經由卽行嚴拏治罪並著伊犁
將軍由北路派撥員弁設卡盤查毋稍疎懈該部知
道

道光八年八月初三日

奏爲查明伊犁直通烏什道路酌議封禁備用事

臣

承准軍機大臣字寄道光八年六月十六日奉

上諭德英阿等奏查明道路籌議情形一摺冰嶺迤西
皆係布魯特游牧現經德英阿等派令湍多布前往
踏勘明確伊犁西南卡外各站接替馬匹勢所難行

其現通南路之軍臺向由額魯特游牧此時亦難將
該處軍臺輕議改設但既查得此路可以直通烏什
惟中間七站係布魯特地方著那彥成就近酌量實
在情形是否應於無事時預爲修治備而不用抑或
竟行封禁以杜偷越之處悉心籌度據實具奏原摺
著鈔寄閱看欽此

臣旋准伊犁將軍德英阿繪圖咨
送前來伏查德英阿原奏內稱自伊犁惠遠城起
十七站行抵烏什中間七站係布魯特游牧既不
能預備馬匹接替亦未便移設軍臺請於無事時
預爲修治平坦伊犁烏什各在原設卡倫多派官

兵巡防每年五六月伊犁派領隊大臣一員烏什
正辦幫辦大臣自行酌定一員各帶兵前往適中
之哈爾海布拉克地方會哨將道路積草亂石平
修一次等語竊思南路通伊犁捷徑前經臣訪聞
阿克蘇西南之巧塔爾達板賽里木所屬之阿爾
通霍什均有徑赴伊犁道路奏請設卡安兵嚴行
封禁在案今查向來伊犁派來南路換防官兵均
由卡外經行布魯特游牧過那林橋至喀什噶爾
共四十五站今年換防官兵卽由此路前來若此
時不由此地轉覺示弱但所奏每年帶兵會哨修

除積草亂石年久悉成坦途便捷之徑殊未周密
臣悉心籌度德英阿派員履勘此路情形中途並
無險阻適遇緩急誠如

聖諭爲行兵神速之徑相應請

旨飭下伊犁將軍烏什辦事大臣將伊犁西南哈布哈
克卡倫烏什迤北貢古魯克卡倫各添派官兵認
眞巡防不准夷民取道往來倘有匪人潛越一經
盤獲照越度邊牆例從嚴治罪庶奸商無從偷越
而有此一路備而不用亦爲周至至該將軍所奏
會哨修治之處亦毋庸議謹

奏

道光八年九月初三日奉

上諭那彥成奏查明伊犁通烏什道路酌議封禁備用
一摺伊犁西南卡倫外有直通烏什捷徑經由布魯
特地方前飭德英阿派員查勘據奏應於無事時預
爲修治平坦各在原設卡倫添兵巡防每年由伊犁
烏什派員會哨一次當經降旨令那彥成悉心籌度
茲據奏南路通伊犁捷徑如巧塔爾達板阿爾通霍
什均經奏請封禁此路並無險阻爲行兵捷徑亦請
封禁備用著伊犁將軍烏什辦事大臣卽將伊犁西

南哈布哈克卡倫烏什迤北貢古魯克卡倫各添派官兵認真巡防不准夷民取道往來倘有匪徒潛越一經盤獲照越度邊牆例從嚴治罪倘守卡員弁不實力稽察任令潛越卽一併嚴叅懲處該將軍前奏每年會哨修治之處著毋庸議

量移軍臺路

道光八年九月十五日會同喀什噶爾叅贊大臣
武公隆阿

奏爲移改阿葉二城軍臺道路事准葉爾羌辦事大
臣札隆阿咨呈阿克蘇至葉爾羌大路綿長一千
三百三十里阿克蘇設軍臺三處葉爾羌設軍臺
十三處葉爾羌設軍臺十三處間段戈壁並有水
草不便之處近年葉屬渾河水大東注不暢巴爾
楚克一帶每當盛漲之時水勢漫溢往往大路不
通雖隨時設法疏消而河形遷徙葉境自第八臺

至十三臺均係濱臨河沿日久難免冲刷前年逆回滋擾沿途軍臺均被焚燬現在鳩工修復若照舊安設將來巴爾楚克一帶積潦爲患仍不免於遷移不如乘此動項修辦之時爲一勞永逸之計等語臣等以葉爾羌迤東軍臺與阿克蘇接壤一經挪移是否能與阿境軍臺聯絡咨令會勘明確呈請核辦去後茲准阿克蘇辦事大臣長清會同札隆阿札克桑阿咨呈札克桑阿與長清又復親身會勘茲查得葉境喀拉塔克軍臺迤北舊有徑路一道直通阿克蘇之渾巴什河今擬將葉爾羌

原設渾河西之喀拉克第八臺移於渾河之東
八十里至圖木舒克設臺一處自圖木舒克六十
里至車底爾科魯設臺一處自車底爾科魯九十
里至雅合庫圖克設臺一處以上均係葉爾羌地
界自雅合庫圖克一百里至齊蘭設臺一處自齊
蘭一百二十里至薩依里克亮噶爾設臺一處自
薩依里克亮噶爾五十里至渾巴什河歸併舊路
以上均係阿克蘇地界計葉境移設軍臺四處裁
減軍臺二處路近四十里現在葉爾羌軍臺一律
估修歸於城工案內彙奏阿克蘇軍臺前經奏蒙

允准動項興修此時料物均已購辦尙未施工堪以移
建並委兩城阿奇木伯克會同履勘據稟原設臺
站積水夏秋泥濘難行當差回戶村莊較遠每年
種收之時兩處照料大有不便新改之路沿途水
草不缺各臺回子卽在附近居住於耕種地畝旣
可照應而在臺當差亦甚近便夏秋牧放馬匹易
於照料回子甚爲樂從實於驛路回情均有裨益
請奏明移改前來等復查無異相應具

奏請

旨俯准阿克蘇境內移設軍臺二處葉爾羌境內移設

軍臺四處裁撤軍臺二處各按新勘地面如式建蓋以肅郵政臣等一面咨令該城大臣乘時興工如有佔礙回子耕種地畝卽行撥還並將程途里數由該城大臣繪圖咨部查核再准烏什辦事大臣布彥泰等咨呈該城所轄察哈拉克軍臺本係阿克蘇地面濱臨大河年久冲刷逼近臺基累年咨調阿克蘇回夫二百名前來築堤禦水無如該處土性鬆浮屢築屢潰甚爲回莊之累本年夏令山水盛漲大溜冲刷尤難捍衛勘得臺西五里哈拉克齊地方有隙地一段形勢高阜堪以移建軍

臺除將察哈拉克舊有房間拆取堪用料物添補
外估須工料銀四百七十餘兩臣等委員覆勘實
係應辦之工咨令照估修建所需銀兩卽在西四
城叛產變價項下動支毋庸造冊報銷欵勘臺基
查係回子業地已指定附近官地撥還謹

奏奉

硃批所辦俱是另有旨

道光八年十月十七日奉

上諭那彥成等奏移改軍臺道路並擇地改建軍臺一
摺所辦俱是阿克蘇至葉爾羌向設軍臺處所近年

渾河水大東注不暢每當漫溢大路不通而河形遷徙日久難免衝刷茲據那彥成等查明葉爾羌境喀拉塔克軍臺迤北舊有徑路一道與阿克蘇之渾巴什河相通請動項遷移爲一勞永逸之計著照所請所有阿克蘇境內移設軍臺二處葉爾羌境內移設軍臺四處裁撤軍臺二處卽各按新勘地面如式建蓋倘有佔礙回子地畝卽行撥還並將程途里數由各該城大臣繪圖咨部查覈又烏什所轄察哈拉克軍臺地濱大河土性鬆浮尤難捍衛著將臺西五里哈拉克齊地方之隙地一段移建軍臺除將察哈拉

克舊房拆取料物添補外估需工料銀四百七十餘兩卽在西四城叛產變價項下動支毋庸報銷該部知道

那文毅公籌畫回疆善後事宜卷七十五